

Na Memoria

Dani Pablo tambe ta un gran futbolista cu tambe a marca historia pa Aruba

ORANJESTAD (AAN): Awe comunidad ta bisa ayo na un otro gran futbolista kende a representa su Isla natal den exterior na diferente ocasion den exterior.

Ta trata di Dani Pablo, kende a cuminsa su carera di Futbol den Junioren. Dani a hunga pa e team di Dakota Boys y despues pa Dakota Jrs.

Na 1960 el a hunga den B-Klasse pa e team Juventud Millionarios, cu a titula Campeon y a promove pa A Klasse.

Na 1961 el a hunga den A-klasse pa Juventud Millionarios y ora e campeonato a caba el a bay hunga pa e team grandi di Dakota. Na November di mesun aña el a hunga su prome wega pa Dakota contra Jong Holland di Curaçao.

Durante su carera Dani a titula tres biaha campeón di e Isla cu Dakota, esta 1962/63, 1963/64 y 1965/66. Dani ademá a hunga den dos Copa Antiano: 1962 y 1963. Ambos biaha Dakota a finaliza como Sub-Campeon Antiano.

Na luna di Maart 1962, Dani a forma parti di e seleccion hubenil di Antias cu a hunga na Panama y a keda na di tres lugar den e Campeonato Centro Americano y del Caribe. E mes un luna aki el a debuta den seleccion di Aruba contra Suriname. En total el a hunga nueve biaha pa reforza e seleccion di Aruba. Na Juli di e aña ey el a debuta den e seleccion di Antias ora



cu Dakota, reforza cu cuatro hungador di Curacao a bay Jamaica pa representa Antias Hulandes na apertura di e stadion nobo na Kingston.

Na September di e aña ey, Dani tabata den seleccion di Antias cu a bay Europa y cu a hunga contra Hulanda y Dinamarca.

Interesante ta cu despues di wega contra Hulanda, tanto Dani como su ruman Juancho a haya oferta pa hunga profesional cu e club A.D.O. di Den Haag. Pero nan no a acepta pasobra y e oferta no tabata atractivo.

Despues den temporada di Februari/Maart 1963, Dani a bolbe bay Jamaica cu e seleccion di Antias cu a gana e torneo contra Haiti y Jamaica. Na

Maart /April el a hunga pa Antias cu a keda na di tres lugar den e campeonato di CONCACAF na El Salvador.

Na Augustus y October di e aña ey, Dani a forma parti di seleccion di Antias cu a hunga weganan eliminatorio contra Suriname pa e weganan Olimpico di Tokyo.

Na Januari/Februari 1965, Dani a hunga pa Antias weganan di pre-Clasificacion pa Mundial di Inglaterra na Jamaica y na Cuba. Antias a keda na di dos lugar y a wordo elimina.

Na Februari el a hunga pa Antias na Curacao contra Suriname y na Maart contra Costa Rica.

Na Maart /April el a bolbe hunga den campeonato di CONCACAF cu

e seleccion di Antias, e biaha aki na Guatemala. Na October/November el a hunga cu Antias na Suriname en conexion cu e di 45 aniversario di Suriname Voetbal Bond.

Na cuminzamento di Maart 1966, Dani a bandona su isla pa asina bay traha na Hulanda.

Despues cu el a bolbe nos isla, Dani tabata un temporada Presidente di e organizacion LIPROF den añanan nobenta. Esaki ta danki na nos amigonan Fico Vrolijk, Tonny Tromp y Dito Mateo.

E potret aki mes ta saca na 1962, ora equipo di Futbol di Aruba hunto cu delegacion Arubano ta aborda avion rumbo Kingston, Jamaica, cu Capitan Steward.

Di robez pa drechi por mira A.D. Croes – Mateo Reyes, Pedro Dijkhoff-Dock Williams, Bernadina –Antonio Tromp. Kirindongo, Jonco Alberts, Guillermo Zievinger, Ange Perez, Jimmy Richardson, Edwin Dirksz, Martis (referee) y Wilbert Sambo.

Esnan para dilanti na banda robez y drechi ta Kelly, Dani Pablo, Juancho Pablo, Benny Geerman, Andresito Bikker, Manuel Oduer (masahista) y Da Cuña (entrenador).

Na famiana di Danny Pablo palabrannan di forza y un danki di tur local el a haci pa deporta di futbol y a representa Aruba dignamente. Articulo aki skirbi en colaboracion cu Django.